

TÍTULO PRELIMINAR I

DISPOSICIÓN XERAIS

ARTIGO 1

A Federación Galega de Municipios e Provincias (FEGAMP) é unha Asociación constituída polos Entes Locais que voluntariamente o decidan, respondendo sempre a súa estrutura e funcionamento ós principios democráticos.

ARTIGO 2

A FEGAMP goza de personalidade xurídica plena e pública para o desenvolvemento das funcións que lle son inherentes.

ARTIGO 3

1.- O ámbito territorial da FEGAMP é o da Comunidade Autónoma de Galicia definido no artigo 2 do Estatuto de Autonomía de Galicia aprobado pola Lei Orgánica 1/1981 do 6 de Abril e disposicións legais do Parlamento de Galicia que o desenvolven. O ámbito competencial incluírá calquera asunto que garde relación cos intereses comúns dos Entes Locais que integran dito territorio.

2.- A FEGAMP ten a súa sede principal na cidade de Santiago de Compostela podendo, non obstante, establecer oficinas de carácter administrativo en calquera outra cidade respondendo sempre a criterios de funcionalidade ou mellor consecución dos fins que son propios á Federación.

3.- As sesións que celebren os órganos da FEGAMP poderán levarse a cabo en calquera lugar do seu ámbito territorial.

ARTIGO 4

O símbolo da FEGAMP é o do Consello de Europa co escudo de Galicia no seu interior impreso sobre unha franxa azul representativa da bandeira de Galicia, tendo ó pé do conxunto as siglas FEGAMP.

ARTIGO 5

A FEGAMP intégrase na Federación Española de Municipios e Provincias, e polo tanto, na Sección Española do Consello de Municipios e Rexións de Europa, conforme as bases que se conteñan no Protocolo que ó efecto se subscriba. Iso non exclúe a posibilidade de establecer cantos acordos de colaboración, coordinación e cooperación se estimen oportunos con outras Asociacións, Organizacións ou Institucións.

En ningún caso as relacións que se establezan con calquera outra Asociación, Organización ou Institución, supoñerá detrimento ou menoscabo da personalidade xurídica e autonomía da FEGAMP.

TÍTULO I

DOS FINS DA FEGAMP

ARTIGO 6

1.- Son fins da FEGAMP:

- a) O fomento e a defensa da autonomía das Entidades Locais.
- b) Promover, representar e defende-los intereses das Entidades Locais ante outras Administracións Públicas.
- c) A promoción e o desenrolo da cultura e lingua galega no ámbito local.
- d) Promover e reivindicar ante os correspondentes poderes públicos canto estime oportuno na orde a lograr o teito competencial das respectivas Entidades Locais.
- e) Fomenta-la participación cidadá na vida local.
- f) O desenrolo e consolidación do espírito europeo no ámbito local baseado na autonomía e solidariedade entre os Entes Locais.
- g) A defensa en xuízo dos intereses da Administración Local Galega si é o caso, así como as actuacións necesarias perante o Tribunal Constitucional dacordo coa súa Lei Orgánica, en defensa da Autonomía Local.
- h) Calquera outro que afecte ou incida de forma directa o indirecta ós seus asociados ou á propia Federación.

2.- En ningún caso, a interpretación destes fins poderá ser tal, que o seu exercicio invada as competencias dos Entes asociados establecidas na Lexislación do Réxime Local.

ARTIGO 7

Ó obxecto de conseguí-los seus fins, a Federación poderá:

- a) Establece-las estruturas orgánicas pertinentes.
- b) Facilitar intercambios de información mutua.
- c) Constituír servicios de asesoramento e asistencia para os seus membros.
- d) Organizar e participar en reunións, seminarios, congresos e xornadas de estudio e orientación.
- e) Dirixirse ós poderes públicos, intervindo, no seu caso, na formulación da normativa legal que afecta os Entes Locais.
- f) Promover publicacións, estudos e documentos informativos na materia da súa competencia.

g) Calquera outra actividade ou función que contribúa á mellor consecución dos seus fins.

ARTIGO 8

No exercicio das atribucións que ten conferidas para o cumprimento dos seus fins estatutarios e a tenor do disposto no artigo 2 dos presentes estatutos, a FEGAMP gozará de plena capacidade para adquirir, posuír, reivindicar, cambiar, gravar, transmitir ou alienar toda clase de bens e dereitos, celebrar contratos ou pactos, subscribir convenios e contraer compromisos ou obrigas, así como exercita-las accións legais que procedan na orde a súa defensa e administración.

TÍTULO II

DOS ASOCIADOS Á FEGAMP

ARTIGO 9

A Federación Galega de Municipios e Provincias estará formada por socios titulares e de honra.

ARTIGO 10

Serán admitidos como socios titulares cos dereitos e obrigas establecidas no artigo 13 dos presentes Estatutos:

- 1.- Tódolos Concellos e Deputacións Provinciais comprendidos no ámbito territorial galego que manifesten, mediante o correspondente acordo corporativo, a súa vontade expresa de adherirse á FEGAMP e de Cumpri-los seus fins estatutarios.
- 2.- As Entidades Locais de carácter supramunicipal ás que se refiren os apartados b), c) e d) do artigo 3º.2 da Lei 7/1985 das Bases de Réxime Local, sempre que o correspondente acordo de adhesión sexa adoptado por unanimidade de tódolos concellos que integren, en cada caso, ditas Entidades. A adscrición á FEGAMP dunha entidade supramunicipal non inclúe a dos concellos que a compoñen.

ARTIGO 11

Terán a consideración de socios de honra as persoas físicas ou xurídicas que, a proposta do Consello Federal, sexan nomeados como tales pola Asemblea Xeral en recoñecemento dos seus destacados méritos ou pola súa especial contribución ós fins da Federación.

ARTIGO 12

1- O alta e a baixa dos socios será aprobada pola Comisión Executiva previa recepción do correspondente acordo plenario da corporación interesada.

2- Os acordos da Comisión Executiva nesta materia faranse constar nas actas correspondentes e no Libro de Rexistro que a tal fin levará a Secretaría Xeral.

3.- O alta efectuarase con data do acordo plenario da corporación. A baixa surtirá efecto a partires do día primeiro de Xaneiro do ano seguinte ó de adopción do acordo.

ARTIGO 13

1.- Os socios titulares terán os seguintes dereitos:

- a) Asistir, con voz e voto, ás sesións das Asembleas ordinarias e extraordinarias, outros órganos rectores ou complementarios nos que estén representados e calquera outro tipo de encontro para os que sexan convocados validamente.
- b) Ocupar cargos nos Órganos Rectores da FEGAMP.
- c) Participar nos traballos e actividades da Federación.
- d) Utiliza-las instalacións e os servicios que preste a Federación.
- e) Promover actuacións e adopcións de acordos.

2.- Os socios titulares terán as seguintes obrigas:

- a) Cumpri-los presentes Estatutos, normas que os desenrolen e acordos validamente adoptados.
- b) Satisface-las cotas, ordinarias e extraordinarias, no tempo e contía que se establezan.
- c) Velar polo cumprimento dos fins estatutarios.

ARTIGO 14

Para o exercicio de tódolos dereitos é preciso estar ó corrente no pago das cotas e, no suposto da convocatoria de calquera órgano, ter a condición de socio titular con anterioridade á data de dita convocatoria.

ARTIGO 15

A condición de socio perderase:

- a) Pola decisión voluntaria do asociado, de acordo co previsto no artigo 12.
- b) Por acordo da Comisión Executiva, previa instrucción do expediente con audiencia á Entidade Local afectada, no caso de incumprimento notorio e reiterado das súas obrigas, sempre que, previamente, esta fora requerida ó efecto.

- c) Por acordo do Consello Federal sen requerimento previo no caso de actos que afecten gravemente ó interese xeral e fins da Federación, sendo precisa a concesión de audiencia no expediente que ó respecto se instrúa, de prioritaria tramitación.
- d) Por impago de cotas por un período superior ó ano, en tal caso a separación non será determinante para nova admisión se a Entidade aboase de forma, voluntaria, e aínda extemporánea, as débedas contraídas e as cotas extraordinarias que lles puideran corresponder durante o tempo da baixa.
- e) Por fusión ou absorción de concellos ou desaparición do Ente Local.

ARTIGO 16

A baixa como socio titular da FEGAMP, calquera que sexa a súa causa, implicará:

- a) A perda dos seus dereitos e obrigas.
- b) A imposibilidade de reclamar devolución patrimonial algunha.
- c) A obriga de aboar as cantidades que, por calquera motivo, adeudara á Federación, salvo acordo do Consello Federal ó respecto, atendendo a excepcionais circunstancias.

TÍTULO III

DOS ÓRGANOS RECTORES DA FEGAMP

ARTIGO 17

Os Órganos Rectores da FEGAMP son os seguintes:

- a) A Asemblea Xeral.
- b) O Consello Federal.
- c) A Comisión Executiva.
- d) A Xunta de Voceiros.

Capítulo I.- Da Asemblea Xeral

ARTIGO 18

1.- A Asemblea Xeral é o órgano soberano da FEGAMP, integrado por un representante de cada un dos socios titulares e por cada un dos socios de honor.

2.- A Asemblea Xeral rexirase polo seu propio regulamento aprobado por ela mesma a proposta do Consello Federal.

ARTIGO 19

Son competencias da Asemblea Xeral:

- a) Deseñar a liña política da FEGAMP.
- b) Aprobar cantas resolucións estime convintes na orde dun mellor desenrolo da actividade e fins da Federación.
- c) Elixir ós membros do Consello Federal, da Comisión Executiva e ó Presidente.
- d) Aprobar e modifica-los Estatutos.
- e) Controla-la xestión do Consello Federal, da Comisión Executiva e do Presidente.
- f) Aproba-la Memoria de xestión do período.
- g) Disolve-la Federación e nomear Comisión Liquidadora.

ARTIGO 20

As reunións da Asemblea Xeral poderán ter carácter ordinario ou extraordinario.

- a) Con carácter ordinario reunirase cada catro anos dentro dos tres meses seguintes á data de constitución da última Entidade Local, e, en todo caso, dentro dun prazo de seis meses desde a data das eleccións municipais.
- b) A Asemblea reunirase con carácter extraordinario cando o acorde o Consello Federal, por propia iniciativa, ou cando o soliciten un número de asociados que represente, cando menos, a metade dos votos da Asemblea, así como a instancias do Presidente, polo acordo da Comisión Executiva ratificado polo Consello Federal ou por vacante de máis dun tercio dos membros da Comisión Executiva.

ARTIGO 21

Calquera que sexa o carácter co que se reúna a Asemblea Xeral, a súa convocatoria será efectuada polo Presidente, ou quen legalmente o substitúa no suposto de vacante, e ratificada pola Comisión Executiva. A convocatoria deberá realizarse alomenos con 20 días de antelación da data da súa celebración.

ARTIGO 22

Tanto para a Asemblea Xeral Ordinaria como para a Extraordinaria, acompañarase á convocatoria unha orde do día comprensiva dos asuntos a tratar.

- a) No caso de Asemblea Xeral ordinaria, poderán ser incluídos na orde do día tódolos asuntos que, sendo inherentes ós fins da Federación, foran propostos por un tercio dos membros da Comisión Executiva ou do Consello Federal; ou ben solicitado mediante escrito de alomenos unha quinta parte dos votos da Asemblea.
- b) No caso da Asemblea Xeral Extraordinaria, sóo poderán debatirse os asuntos incluídos na orde do día.

ARTIGO 23

1.- Como regra xeral, para a adopción de calquera resolución ou acordo será necesaria a maioría simple dos votos da Asemblea Xeral.

2.- Para a elección dos Órganos Rectores aplicarase o disposto no artigo 29 dos presentes Estatutos.

3.- O acordo de modificación dos Estatutos deberá ser aprobado polo número de votos que representa a maioría legal da Asemblea ou en todo caso polos tres quintos dos votos presentes.

4.- O acordo de disolución da Federación deberá ser adoptado na Asemblea extraordinaria convocada ó efecto e terá que ser aprobado por, alomenos, tres cuartas partes dos votos da Asemblea.

5.- Computarase como abstención a de aqueles membros que se ausentasen da reunión no momento da votación.

ARTIGO 24

1.- O número de votos de cada socio na Asemblea é o expresado na seguinte escala:

- a) Corporación de ata 2.500 habitantes.....2 votos.
- b) Corporación de 2.501 a 5.000 habitantes..... 3 votos.
- c) Corporación de 5.001 a 10.000 habitantes 5 votos.
- d) Corporación de 10.001 a 20.000 habitantes.....10 votos.
- e) Corporación de 20.001 a 50.000 habitantes..... 15 votos.
- f) Corporación de 50.001 a 100.000 habitantes.....30 votos.
- g) Corporación de 100.001 a 500.000 habitantes.....50 votos.
- h) Corporación de 500.001 a 1.000.000 habitantes.....75 votos.
- i) Corporación de máis de 1.000.000 habitantes.....100 votos.

2.- A determinación dos votos realizarase respecto ós habitantes de dereito, de acordo coa derradeira ratificación padronal, sendo o número de habitantes de cada Corporación Provincial o resultado da suma dos habitantes de dereito dos Concellos nela agrupados.

ARTIGO 25

A Asemblea Xeral constituirase validamente, na primeira convocatoria, coa asistencia de socios que representen a metade máis un dos votos da Asemblea.

Na segunda convocatoria, unha hora máis tarde, calquera que sexa o número de votos representados.

ARTIGO 26

Será admitida a delegación de voto dunha Corporación noutra, por resolución do Presidente da primeira, que deberá ser remitido no prazo fixado na Convocatoria.

ARTIGO 27

Os debates, acordos e resolucións da Asemblea quedarán reflexados nas correspondentes actas que levará a Secretaría Xeral.

Capítulo II.- Do Consello Federal

ARTIGO 28

O Consello Federal, como órgano máximo entre Asembleas, é o encargado de desenrolar as resolucións aprobadas pola Asemblea Xeral.

ARTIGO 29

A.- Integran o Consello Federal 55 membros elixidos entre os socios titulares pola Asemblea Xeral con arreglo ó seguinte procedemento:

1.- As candidaturas serán pechadas e incluírán un máximo de 55 candidatos e un mínimo de 17.

2.- A votación realizarase a candidaturas completas sen introducirse nelas modificación algunha.

3.- Para a válida presentación de candidaturas deberá ser avalada alomenos polo cinco por cento dos votos da Asemblea.

Serán elixidos membros do Consello Federal os 29 primeiros candidatos da candidatura máis votada, os 17 da segunda, os 7 da terceira e os 2 da cuarta. No suposto que fora presentado un número de candidaturas inferior, as vacantes que queden por cubrir serán ó resto de candidaturas, exceptuando a primeira, polo seu orde.

B.- Serán elixidos membros da Comisión Executiva os 9 primeiros candidatos da candidatura máis votada, os 5 da segunda, os 2 da terceira e o primeiro da cuarta. No suposto que fora presentado un número de candidaturas inferior, as vacantes que queden por cubrir serán ó resto de candidaturas, exceptuando a primeira, polo seu orde.

C.- O número 1 da candidatura máis votada será proclamado Presidente da Federación, sendo o seu número 2 o Vicepresidente Executivo. O número 1 da segunda lista máis votada será proclamado Vicepresidente Primeiro, correspondéndolle a Vicepresidencia Segunda ó primeiro da terceira lista máis votada.

ARTIGO 30

Son competencias do Consello Federal:

- a) Cumprir e facer Cumprir as resolucións da Asemblea Xeral.
- b) Velar polo cumprimento dos fins estatutarios.
- c) Aproba-lo regulamento de réxime interior e poñer o das Asembleas á Asemblea Xeral.

- d) Aproba-las cotas sociais da FEGAMP, xa sexan de carácter ordinario ou extraordinario, a proposta, neste derradeiro caso, da Comisión Executiva.
- e) Aprobar anualmente os presupostos e as contas xerais.
- f) Decidir sobre aqueles asuntos que, pola súa urxencia, non poden ser presentados á Asemblea Xeral, dando conta a esta cando se celebre.
- g) Cubri-las vacantes que se produzan na Comisión Executiva e no propio Consello Federal conforme ó disposto nos presentes Estatutos.
- h) Resolver sobre a perda da calidade de socio no suposto contemplado no artigo 15.c.
- i) Cantas outras lle correspondan con arranxo ás leis, a estos Estatutos e normas que os desenrolen.

Poderá delegar na Comisión Executiva tódalas súas competencias excepto a c), e), g) e h), sen prexuízo do disposto no artigo 31.4 dos presentes Estatutos.

ARTIGO 31

1.- Os membros do Consello Federal deberán ostenta-la condición de Presidente ou representante, debendo ostentar neste derradeiro caso a condición de cargo electo local da súa respectiva Corporación. De tódolos xeitos, se perderan a condición de Presidente pero mantivesen a de cargo electo local, poderán continuar como membros do Consello sempre que concorran algunhas das seguintes circunstancias:

- a) Que a perda da Presidencia da Corporación se producira no derradeiro ano de mandato.
- b) Que a Corporación lle otorgue a representación nos órganos da FEGAMP.

No caso contrario, causarán baixa inmediatamente, sendo substituídos polo Consello Federal de entre os Presidentes ou representantes das corporacións asociadas pertencentes ó mesmo grupo político do que cesara.

2.- Cesarán automaticamente os membros do Consello Federal que, por calquera motivo, deixarán de pertencer ó grupo político polo que foron elixidos, sendo substituídos polo Consello Federal de entre os pertencentes ó mesmo grupo.

3.- No caso de vacante non motivada por ningunha das causas previstas nos números 1 e 2 deste artigo, o posto será cuberto polo Consello Federal de entre os pertencentes ó mesmo grupo político ou candidatura que a vacante.

4.- Unha vez realizada a convocatoria da Asemblea Xeral Ordinaria, o Consello Federal quedará disolto, pasando tódalas súas competencias á Xunta de Voceiros.

5.- Sen prexuízo do disposto nos anteriores números deste artigo, o mandato dos membros do Consello Federal abarcará o período comprendido entre a súa elección e a convocatoria da Asemblea Xeral ordinaria.

ARTIGO 32

- 1.- O Consello Federal reunirase en sesión ordinaria alomenos unha vez o ano.

2.- Con carácter extraordinario reunirse cando así o acorde o Presidente, a Comisión Executiva, a Xunta de Voceiros ou a cuarta parte polo menos do propio Consello. Neste derradeiro caso non poderá superarse un límite de 3 xuntanzas ó ano e a solicitude formalizárase por escrito, asinada por tódolos peticionarios e a xuntanza celebrarase nun prazo non superior a trinta días, contados a partir da data na que o escrito tivese entrada na Secretaría Xeral da FEGAMP.

ARTIGO 33

1.- Corresponde ó Presidente da FEGAMP a convocatoria de tódalas sesións que celebre o Consello Federal.

2.- A convocatoria acompañarase da correspondente orde do día comprensiva dos asuntos a tratar que será aprobada polo Presidente e que deberá incluír, sempre que se trate de sesións ordinarias, o punto de rogos e preguntas. Asemade acompañaranse os borradores das actas das sesións anteriores que deban ser aprobadas, no seu caso.

ARTIGO 34

1.- O Consello Federal constituirase validamente na primeira convocatoria coa asistencia da metade máis un dos membros que o compoñen. En segunda convocatoria, unha hora máis tarde, calquera que sexa o número dos membros presentes nese momento.

2.- Ningún dos membros do Consello Federal poderá delegar noutro da súa Corporación a asistencia ás sesións do mesmo.

ARTIGO 35

1.- O Presidente dirixirá o desenrolo das sesións, correspondéndolle, a tal efecto, á ordenación dos debates e intervencións que se produzan, así como a decisión dos asuntos que deban someterse a votación.

2.- Os acordos do Consello Federal adoptaranse, no seu caso, por maioría simple dos votos emitidos polos membros asistentes ó Consello que se atopen presentes no momento da votación.

3.- Cada un dos membros do Consello Federal ostentará un só voto que terá carácter non delegable.

4.- O voto pode emitirse no senso afirmativo ou negativo, podendo os membros do Consello Federal absterse de votar. Computarase como abstención a de aqueles membros do Consello que se ausentaran da reunión no momento da votación.

5.- No caso de votacións con resultado de empate, decidirá o voto de calidade do Presidente.

ARTIGO 36

Os acordos do Consello Federal quedarán reflectidos nas correspondentes actas que levará a Secretaría Xeral.

Capítulo III.- Da Comisión Executiva

ARTIGO 37

1.- A Comisión Executiva da FEGAMP é o órgano encargado de levar á práctica os acordos da Asemblea Xeral e do Consello Federal.

2.- A Comisión Executiva será renovada cada catro anos no curso da Asemblea Xeral ordinaria.

ARTIGO 38

1.- A Comisión Executiva da FEGAMP estará composta por:

A) O Presidente

B) Tres Vicepresidentes que serán, pola súa orde, Vicepresidente Primeiro, Vicepresidente Segundo e Vicepresidente Executivo.

C) Trece vocais.

2.- A toma de posesión dos cargos dos membros da Comisión Executiva, producirase inmediatamente despois da súa proclamación como tales pola Asemblea Xeral, durando o seu mandato o período comprendido entre cada unha das reunións ordinarias da Asemblea Xeral da FEGAMP.

ARTIGO 39

1.- Sen prexuízo do previsto nos artigos 31.1 e 2, as vacantes de Vicepresidentes e vocais serán cubertas polo Consello Federal de entre os membros das candidaturas, ou grupos, afectados pola vacante ata a celebración da próxima Asemblea Xeral ordinaria.

2.- Conforme o disposto no artigo 20.b, se as vacantes na Comisión Executiva chegasen a ser superiores no número a un tercio dos seus membros, procederase a convocar Asemblea Xeral de xeito urxente.

ARTIGO 40

1.- Corresponde á Comisión Executiva:

a) Cumpri-los acordos do Consello Federal e da Asemblea.

b) Aplica-lo regulamento de réxime interior.

c) Designa-los representantes das Corporacións Locais naqueles organismos onde exista representación local.

d) Establece-la forma de cooperación con outras Federacións.

e) Administra-lo patrimonio da Federación.

f) Acorda-la realización de tódalas operacións relativas a avales, hipotecas e demais garantías reais, así como a solicitude de créditos e préstamos.

g) Admitir novos socios.

h) Acordar cantas accións legais e administrativas foran necesarias na defensa dos intereses locais.

- i) O nomeamento e cese, no seu caso, do Secretario Xeral, o Director Xeral e o Interventor, á proposta do Presidente.
- j) Autorización e disposición de gastos por operacións de capital se o seu importe é superior a seis mil euros.
- k) Acorda-la creación ou disolución, no seu caso, das Comisións Informativas, así como dos Comités e Seccións.
- l) Coñecer e decidir en todo caso sobre os acordos que, en forma de propostas á Comisión Executiva, sexan adoptados polas distintas comisións.
- m) Cantas outras lle correspondan conforme ás leis, estos Estatutos e normas que os desenrolan así como todas aquelas que lle poida delega-lo Consello Federal.

2.- A Comisión Executiva, a proposta do Presidente, poderá delegar na Xunta de Voceiros as facultades que estime convenientes para unha maior operatividade.

ARTIGO 41

1.- A Comisión Executiva reunirse en sesión ordinaria alomenos catro veces ó ano, unha por cada trimestre natural, e en sesión extraordinaria cando sexa convocada con tal carácter polo Presidente ou solicitado por, alomenos, unha terceira parte dos seus membros.

2.- En tódolo demais relacionado co réxime de sesións e adopción de acordos, será de aplicación á Comisión Executiva o disposto nos artigos 33. a 36., ambos inclusive, do capítulo anterior para o Consello Federal.

Capítulo IV.- Da Xunta de Voceiros

ARTIGO 42

A Xunta de Voceiros estará formada polo Presidente e un voceiro de cada un dos grupos Políticos, nomeado por estes incluíndo un suplente, que obtivera representación na Comisión Executiva.

A Xunta de Voceiros actuará sempre con voto ponderado en función da representación que cada grupo teña no Consello Federal.

1.- Son funcións da Xunta de Voceiros todas aquelas que, sendo propias da Comisión Executiva, sexan delegadas por esta en orde a establecer unha maior operatividade nos temas inherentes á Federación, en consonancia có artigo 40.2 ademais das xa especificamente atribuídas ou delegadas nos presentes Estatutos e nas normas que os desenrolen.

2.- A Xunta de Voceiros poderá desempeñar competencias executivas por delegación expresa da Presidencia e/ou da Comisión Executiva. A Xunta de Voceiros será presidida polo Presidente da FEGAMP, directamente ou por delegación.

ARTIGO 43

1.- A Xunta de Voceiros reúne mediante convocatoria do Presidente.

2.- As súas reunións celebraránse coa periodicidade que fixe a Comisión Executiva, sendo, en todo caso, de alomenos periodicidade mensual, ou de carácter extraordinario a instancias, neste derradeiro caso, do Presidente ou de dous dos seus membros.

Capítulo V.- Do Presidente

ARTIGO 44

O Presidente da Federación, elixido conforme ó artigo 29 dos presentes Estatutos, é o representante ordinario da FEGAMP.

ARTIGO 45

1.- No caso de ausencia ou enfermidade, será substituído polos Vicepresidentes pola súa orde.

2.- No caso de dimisión, falecemento ou perda da condición de electo local, asumirán interinamente a Presidencia os Vicepresidentes polo seu orde, ata que a proposta do Grupo Maioritario se designe Presidente polo Consello Federal. O seu mandato durará o do Presidente a quen substitúa.

3.- Salvo no suposto previsto no apartado anterior, o mandato do Presidente abarcará o período comprendido entre cada unha das reunións ordinarias das Asembleas Xerais da FEGAMP, continuando en funcións ata a elección de novo Presidente, no seu caso.

4.- Sen prexuízo do disposto nos presentes Estatutos, os Vicepresidentes terán as seguintes atribucións:

A) O Vicepresidente Primeiro ostentará, na ausencia do Presidente, a plena representación da Federación en tódolos actos e en calquera ámbito, e terá as atribucións que o Presidente lle delegue.

B) O Vicepresidente Executivo exercerá aquelas funcións que, en materia político-administrativa, lle delegue o Presidente.

ARTIGO 46

1.- O Presidente da Federación o será tamén do Consello Federal, da Comisión Executiva e da Xunta de Voceiros e terá as seguintes atribucións:

a) Dirixi-lo goberno e a administración da Federación.

b) Representar legalmente á Federación.

c) Exercita-las accións legais e administrativas, podendo conferir poderes a tal fin, dando conta á Comisión Executiva.

- d) Convoca-la Asemblea Xeral e convocar e presidir as sesións do Consello Federal, da Comisión Executiva e da Xunta de Voceiros, así como dos demais órganos se asume a súa Presidencia efectiva, dirixindo as súas deliberacións.
- e) Proponer á Comisión Executiva o nomeamento e cese, no seu caso, do Secretario Xeral, o Director Xeral e do Interventor.
- f) Executar e controla-lo cumprimento dos acordos da Comisión Executiva, Consello Federal e Xunta de Voceiros.
- g) O recoñecemento e liquidación de obrigas e ordenación do seu pago respecto a calquera tipo de gasto.
- h) A autorización e disposición de gastos no caso de operacións correntes e no caso de operacións de capital se o seu importe é igual ou inferior a seis mil euros.
- i) Delegar facultades nos Vicepresidentes, Vocais e outros Órganos Complementarios de Xestión.
- j) Calquera outra función que lle sexa delegada polo Consello Federal ou da Comisión Executiva, ou que non sexa expresamente atribuída a outros órganos da FEGAMP.

2.- O Presidente ten voto de calidade no caso de empate.

TÍTULO IV

ÓRGANOS COMPLEMENTARIOS DE XESTIÓN

ARTIGO 47

1.- Son órganos complementarios de xestión da FEGAMP:

- A) A Secretaría Xeral
- B) A Dirección Xeral
- C) A Intervención

2.- O mandato dos órganos Complementarios de Xestión da FEGAMP coincidirá co da Comisión Executiva, podendo ser reelixidos sucesivamente.

3.- No caso de ausencia ou vacante de calquera dos órganos Complementarios de Xestión, a súa titularidade será cuberta provisionalmente por unha persoa ó servizo da FEGAMP nomeada polo Presidente mentres non se produza, no caso de vacante, a designación do novo titular.

ARTIGO 48

1.- A Secretaría Xeral terá aquelas funcións que a normativa vixente en cada intre atribúa á Secretaría da Administración Local, sen prexuízo daquelas estatutariamente asignadas a outros órganos da FEGAMP.

2.- O seu titular será designado e cesado, no seu caso, pola Comisión Executiva a proposta do Presidente.

ARTIGO 49

1.- A Dirección Xeral exercerá por delegación da Presidencia a Xefatura ordinaria do Persoal, sendo responsable da xestión técnico-administrativa da Federación así como da coordinación de tódolos servicios, estudos e publicacións da mesma.

2.- O seu titular será designado e cesado, no seu caso, pola Comisión Executiva a proposta do Presidente.

ARTIGO 50

1.- A Intervención terá aquelas funcións que a normativa vixente en cada momento atribúa á intervención da Administración Local, sen prexuízo daquelas estatutariamente asignadas a outros órganos da FEGAMP.

2.- O seu titular será designado e cesado, no seu caso, pola Comisión Executiva a proposta do Presidente.

TÍTULO V

DOUTROS ÓRGANOS DA FEGAMP

Capítulo I.- Das Comisións Informativas

ARTIGO 51

Poderán constituírse Comisións Informativas para a elaboración de Estudos e formulación de propostas sobre cuestións directamente relacionadas cos fins da FEGAMP. Ditas Comisións serán creadas pola Comisión Executiva quen designará o seu Presidente, que terá a condición de membro do Consello Federal ou Presidente de Corporación.

Estarán asistidas por un Secretario designado polo Secretario Xeral de entre o persoal ó servizo da Federación.

O Director Xeral da FEGAMP coordinará o funcionamento destas Comisións.

Capítulo II.- Dos Comités e Seccións.

ARTIGO 52

Poderán crearse no seno da FEGAMP comités ou seccións por acordo da Comisión Executiva. Estes comités ou seccións estarán formados por asociados que se agrupen no contorno a un interese específico.

Terán autonomía para organizarse internamente, sometendo as súas normas de funcionamento e os seus acordos á Comisión Executiva da FEGAMP.

TÍTULO VI

DAS RELACIÓNS COAS ADMINISTRACIÓNS, INSTITUCIÓNS E OUTRAS ENTIDADES

ARTIGO 53

A FEDERACIÓN GALEGA DE MUNICIPIOS E PROVINCIAS é o interlocutor, en representación dos asociados, ante a Administración, o Parlamento e o Goberno Autonómico Galego. Asemade o será ante as instancias que integren a organización institucional do Estado Español e da Comunidade Europea, sen prexuízo da actuación no mesmo senso da FEMP e do Consello de Europa.

ARTIGO 54

No suposto de que algún asunto concreto que afecte ó conxunto das Corporacións Locais Galegas requira calquera tipo de intervención ante a Administración Central, as Cortes Xerais, o Goberno de España ou as demais instancias que integran a organización do Estado, as accións pertinentes ante os órganos que procedan corresponderán, na súa titularidade, ó establecido no protocolo da colaboración e coordinación asinado coa FEMP. No seu defecto, será a Comisión Executiva quen se atribúa expresamente dita facultade.

ARTIGO 55

As relacións e negociacións axeitaranse ó mandato expreso da Comisión Executiva, e poderán incluír expertos e técnicos alleos á FEGAMP.

TÍTULO VII

DO RÉXIME ECONÓMICO DA FEGAMP

ARTIGO 56

Os recursos da Federación Galega de Municipios e Provincias procederán:

- a) Das cotas e demais aportacións dos socios titulares.
- b) Das rendas do patrimonio da Federación.
- c) Das achegas e subvencións que proveñan das Administracións Públicas.
- d) Doutras que se podan producir.

ARTIGO 57

1.- As cotas sociais terán carácter ordinario ou extraordinario.

2.- Con carácter xeral, as cotas ordinarias serán aprobadas anualmente polo Consello Federal, o cal determinará a súa contía en función dunha cantidade fixa por cada un dos habitantes de dereito do territorio correspondente a cada Entidade asociada.

3.- Eventualmente, e polo tempo que se fixe como necesario no seu caso, o Consello Federal poderá acorda-la imposición de cotas de carácter extraordinario, cunha contía periódica que se determinará, igualmente, en función dunha cantidade fixa por cada un dos habitantes de dereito do territorio correspondente a cada socio titular.

ARTIGO 58

A cota fixada pola FEGAMP e a correspondente á FEMP, serán independentes entre sí, fixándose no correspondente protocolo de colaboración e coordinación o procedemento para o cobro de ámbalas dúas. No seu defecto corresponde a cada entidade a xestión do cobro da súa cota respectiva.

ARTIGO 59

As cotas de carácter ordinario devengaránse o primeiro día de xaneiro de cada ano e deberán ser ingresadas polos socios no primeiro cuadrimestre do ano correspondente. Todo iso sen prexuízo de que por parte da propia FEGAMP se negocien e poñan na práctica ferramentas de cobro bancario para axilizar e simplifica-la xestión.

O período de remuneración e ingreso das cotas que, no seu caso, se establezan con carácter extraordinario, será o que se determine no correspondente acordo de fixación das mesmas.

TÍTULO VIII

DA DISOLUCIÓN DA FEGAMP

ARTIGO 60

Para a disolución da Federación será necesario adoptar en Asemblea Xeral Extraordinaria acordo con maioría de tres cuartas partes dos votos da Asemblea.

Disolta a Federación procederase a súa liquidación, repartíndose o patrimonio social entre os socios titulares na proporción á contía das súas respectivas cotas ordinarias, una vez deducido-los recursos necesarios para o cumprimento das obrigas pendentes.

Sen prexuízo do anterior, o acordo da disolución da Federación poderá prever, na orde ó reparto social do seu patrimonio, a aplicación de criterios de proporcionalidade que teñan en conta a antigüidade de cada socio titular.

DISPOSICIÓN FINAL

PRIMEIRA

E competencia da Comisión Executiva aprobar o Regulamento de Réxime Interior así como propoñer á Asemblea Xeral, cando esta se celebre, unhas “Normas de Funcionamento da Asemblea”.

DISPOSICIÓN DEROGATORIA

Quedan derogados calquera norma e Estatutos aprobados con data anterior á celebración desta Asemblea, así como calquera outra resolución que se opoña ós presentes.

D. Xosé Manuel Piñeiro Amigo, Secretario Xeral da Federación Galega de Municipios e Provincias (FEGAMP), certifico:

Que os presentes Estatutos que preceden, compostos de 60 artigos, unha disposición final e unha disposición derogatoria, son os aprobados pola Asemblea Ordinaria da FEGAMP, celebrada o 4 de Decembro de 2003, que sen modificación algunha permanecen vixentes ó día da data.

En Santiago de Compostela, a 4 de Decembro de 2003.